

四庫全書

史部

欽定四庫全書

史部

山西通志卷十二

詳校官監察御史_臣查善長

檢討_臣德生覆勘

總校官進士_臣朱 鈐

校對官編修_臣勵守謙

謄錄監生_臣于希賢

欽定四庫全書

山西通志卷十二

關隘

四

朔平府

右玉縣

右玉長城東北自縣境破虎堡邊界接左雲縣寧魯堡
邊界三十里起西南至縣境雲石堡邊界五十里交
平魯縣大河堡邊界五十里止共袤一百三十里

破虎堡營分管邊牆東自左雲寧魯堡頭墩邊界起西至殺虎堡邊界止袤六十里三分 舊邊墩一十七座今邊墩六十八座外甃樓三座舊火路墩五座今火路墩一十八座

殺虎堡營分管邊牆東自閤門二十臺起至破魯堡邊界止袤一十二里西自閤門二十臺起至朔平城守營邊界止袤一十五里共袤二十七里 舊邊墩二十八座今邊墩四十二座

東接破虎堡界十九墩袤二十里西至三十九墩止

接石衛營汎
界袤十五里

舊火路墩六座今火路墩五座

朔平府城守營分管邊牆北自殺虎口邊界起南至雲
石堡邊界止袤四十一里 舊邊墩四十一座今邊
墩一十四座 舊火路墩四十六座今火路墩八十
九座

雲石堡營分管邊牆北自朔平城守營邊界起南至威
遠堡頭墩邊界止袤二十四里八分 舊邊墩四十
五座今邊墩一十五座 舊火路墩一十四座今火

路墩一十座

威遠堡營分管邊牆北自雲石堡邊界起南至威虎堡邊界止袤一十五里三分 舊邊墩一十六座今邊

墩五座

府志北接雲石堡界南至平魯縣界袤三十四里

舊火路墩四十五

座今裁併

明破虎堡制照壁山墩破虎堡界首東接左衛半坡墩西為雙營兒北對鷹窩山又西為鎮溝墩北對雙廟又西為三公又西為古長城墩又西有小關北直古

城又西為饅頭山西有關又西為曹家北山垣凸而北又西為山前墩北對安子山南直破虎堡界止為垣二十一里嘉靖十七年二月俺答繇安子山入

明馬堡制水泉兒墩馬堡界首東接破虎堡山前墩東為道溝又西為虎頭山垣凸而北又西為邢家溝二溝中有雙水口墩又西為石嶺有小關岐道北出北對雙土山又西為馬尾山東西有水口垣凸而北南直馬堡又西為中馬尾墩至右衛殺虎堡兔毛河胥

有塹又西為西馬尾墩馬堡界止為垣二十三里

今隸破虎堡汛

明殘狐堡制芹菜坡墩殘狐堡界首東接馬堡西馬尾墩西為卧羊坡又西為羊平草場又西為暗門又西為天橋兒北直古城又西有小關岐道北出又西為野猪窩又西為舊堂子墩南直殘狐堡又西為東鶯圪塔墩北直雙古城又西有關殘狐堡界止為垣二十三里 今隸破虎堡汛

明殺虎堡制新水口墩殺虎堡界首東接殘狐堡東鶯
圪塔墩西為小水口北對舊巖西有小關歧道北出
又西為東山水口北直舊豐州城西為古道坡垣凸
而北又西為古道溝有小關北出又西為黑龍王坡
垣凸而北北對石人兒又西為黑龍王灘又西為井
溝有土溝北對大窰又西為山寨溝長墩殺虎堡界
止為垣一十八里

明右衛制石崖墩北對平垣山大同右衛界首東接殺

虎堡山寨溝長墩西為劉隔子溝又西為暗門北對
大虎石又西為半坡又西為堵牆二墩間北對陵角
海南直殺虎堡界右衛關東在東鶯圪疸西在西鶯
圪疸又少西為兔毛河東西墩兔毛河折流出二墩
之間河中有堵牆堵牆西南又有堵柵兔毛河西墩
至老營堡五眼井墩止胥有塹又西為西馬頭又西
為小關有水流出又西為小水口垣凸而北又西為
朱家溝又西為西鶯圪疸有小關又西為陡溝北坡

垣凸而北又西為陡溝水口又西為黃家山北直雙山又西為乾溝子有小關三水匯而流出又西歷二墩至金家山南直楊鐵口堡又西為宰寨北直紅牆又西為幸兒坡垣少凸而北又西為小莊窩北直忙牛嶺又西為孔家溝墩長城垣為西盡黃草梁墩復折而南長城自左雲拒門堡起勢迤西南至右衛黃草梁墩全折而南又迤西南至平魯大水口堡又全折而南北左雲右玉平魯長城之大勢也黃草

梁墩長城折南東接孔家溝墩西對玉林山又南為
菜樹坡長城凸而西西對勝山兒又南歷二墩至雙
溝西對大青山尾此明山西防秋分土之界也繇雙
溝南至了角山一百十四里地隸大同汎隸山西又
南為邊家山又南為土兒墩西直黃土山又南為勝
土寨墩大同右衛界止為垣七十二里 今隸雲石
堡汎

明拒狐堡制北石山墩北接右衛勝土寨墩長城少凸

而西拒狐堡界首南為半破墩長城少凸而西東直
拒狐堡又南為鎮河墩又南有小關又南為王石匠
墩有河西對尖山又南為界牌梁東少南直威遠衛
城又南為營盤山墩長城少凸而西拒狐堡界止為
垣一十二里 今隸威遠城汛

明威遠衛制井溝墩北接拒狐堡營盤山墩西直大團
山威遠衛界首南為沙嶺又南為小關又南為大營
盤山長城凸而西又南為劉三河小大沙溝西直青

山又南有關又南為窰溝又南為雙山子長城少凸而西又南為雙窰溝則少凹而東矣又南為五箇砦復凸而西又南為周二河墩威遠衛界止為垣一十六里

破虎堡東北五十里大同府西北一百五十里東至邊牆一里半西至殺虎堡五十里南至寧魯堡三十里北至邊牆三百步東南到威寧堡西南到縣治五十里明嘉靖二十二年建堡方一里高三仞厚二仞

餘門樓一萬厯二年展修周二里零八步高連女牆
三丈八尺甃包明楊博右衛路通疏一議增墩臺
右衛至左衛一帶前議每四里設墩一座猶恐其疎
合無每空再加二座大約每里許該墩一座左衛至
高山站視右衛為稍衛每五里見有墩臺一座每空
再加一座大約二里半該墩一座高山站至鎮城視
右衛為少緩原無墩臺每五里該墩一座候牛心山
等堡并墩臺完日繼理其中路草溝堡官人屯梁家

店齊家河北花園馬道口六處西路小邨兒一處應
添墩堡并沿邊牆塹照原議具奏

馬堡破虎堡南明嘉靖二十五年建萬厯元年石包周
一里五十四步高連女牆三丈五尺舊分管邊牆袤
一十里四分邊墩一十五座火路墩四座今裁併

殘狐堡破虎堡西明嘉靖二十三年建隆慶六年石包
周一里一百三十四步高連女牆三丈六尺五寸舊
分管邊牆袤一十五里三分邊墩二十四座火路墩

九座今裁併

殺虎堡北二十里大同府西北二百一十里東至破虎堡五十里西至邊牆三里南少東至縣治二十里北至邊牆一里 明嘉靖二十二年建方一里高三仞厚二仞餘門樓一萬厯二年展修周二里零二十步高連女牆三丈五尺甃包四十三年復建殺虎新堡名平集堡東西廣一百九十步南北袤一百七十步周二里牆亦高連女牆三丈五尺分駐守備一員

明兵備張維樞議宜摘近關牆處另築一土堡中建商店凡交易俱在此不得闖入殺虎堡城或每月限期每日限時立定規制

混元峰北二十里殺虎堡左高五里東北胥連邊外盤踞數十里

馬營河堡殺虎堡東南明萬厯元年建周八分高連女牆三丈九尺舊分管邊牆袤五里五分邊墩八座火路墩一座今裁併 明嘉靖三十三年叅將自左衛

移駐右衛轄城堡十三左衛右衛殺虎破虎鐵山牛
心殘虎馬堡雲陽紅土黃土三屯馬營河

兔毛河西北二十里發源東北十里響水溝流至城北
八里會馬營諸河流出口外東勝州入黃河建牆
堞一座西三十里又有小隘口王瓊曰大同右衛

兔毛河口最為要衝明太學陳善兔毛河設險議
兔毛河在右衛之北直出境外邊塞溪谷與通寇水
者固多然小之可竇城塞於梁而導水出入暗門是

也大之可墩隨其曲折而置守於山敵臺是也兔毛
之水派流平漫中難為竇涯澣土壤旁難為墩故守
者病之間嘗計曰岸築高墉與長城等隨水曲折長
數里餘河流寬不百步而兩岸乘墉者以火石擊之
無不守之理矣 明兵備張維樞修兔毛河橋議殺
虎堡當西北極邊最稱要隘而兔毛河橋直通塞外
夏秋之交波流洶湧勢奔力猛歲修歲潰此橋一瑕
數百里之垣皆瑕本道念邊垣肩背河橋咽喉急肩

背而緩咽喉非計也今議列五款一議橋洞洞孔多則奔流易疏孔少則猛突難禦計修中大水洞一孔東西小水洞一十四孔照城門砌券斧刃交立共用券石九百九十一丈四尺壓券鑿網等石三千三百六十八丈此所謂多洞孔以疏其流者也一議鋪底底基深則堅厚難衝基淺則脆薄易陷今計入地剖坑一丈先用木杆排釘乃安底石鋪至十層石用長八九尺厚至尺餘者橋底東西並內外八字約濶六

十二丈長二十一丈共用底石三萬九千六百丈木
杆一千八百根此所謂深鋪底以固其基者也一議
橋身身中用碎石則支助無力用石條砌壘則牢固
難動今議每座高一丈八尺週圍八丈用石三十六
層每層週圍石條一百四十四丈約馬頭橋身內外
用石條五萬一千八百四十丈此所謂廣橋身以培
其勢者也一議橋樓下堅則水順注上隆則基益奠
今計橋上建樓三間南北深入一丈八尺東西濶二

丈七尺高一丈五尺直北包甃牆一堵東西南用門
窓事竣後應撥軍夫二十名住防看守以防緩急此
所謂築牆樓以壯其威者也一議夫匠工費今以數
百里邊垣寄咽喉於茲橋且下深上隆一橋而兼兩
橋之工據該堡軍夫二百名三路應派軍夫一千五
百名其石匠三百名在內喫緊以鋪完橋底為先限
兩個月河橋鎮樓次第併力限七個月邊地最苦寒
凍先行辦料限三月初旬興工此所謂集衆力以要

其成者也若工無冒破橋可永久各委官乞破格優叙以為捍邊任勞者勸 翁萬達疏自陽河靖魯堡起西至右衛兔毛河止為垣三百七里有奇塹如之敵臺六百二十有二舖屋如之暗門一十有七自右衛兔毛河起至了角山止為垣一百九十二里有奇塹如之敵臺二百七十有五舖屋如之暗門六月城六十靖魯至右衛者役大同右衛至了角者役山西紅土堡在東南石包火路墩七座

黃土堡紅土堡東南火路墩九座

雲陽堡牛心堡東南火路墩一十四座

祁河堡縣南火路墩九座俱裁併

雲石堡西南四十里大同府西二百二十里東至威遠
城界六里西至邊牆二里南至大水口堡界二十里
少東至平魯縣七十里北至右玉縣界二十里東南
到威遠城西北到大水口堡二十五里東北到縣治
四十里 明嘉靖三十八年建萬曆十年改建於王

石匠河輒包周一里七分高連女牆四大一尺

鐵山堡雲石堡東北明嘉靖三十八年建萬厯二年輒
包周一里四分零高連女牆三丈五尺舊分管邊牆
袤一十里五分邊墩二十二座火路墩十座今裁併
威遠城南五十里大同府西一百五十里東至左雲縣
三十里西至大水口堡五十里南少西至平魯縣六
十里北至縣治五十里西北到雲石堡 明正統三
年築方四里高四仞厚三仞餘門樓四萬厯三年展

修周五里八分零高連女牆四丈甃色 明叅議左
熙修威遠城記叅將牛應詔董役拆修六百餘丈覆
以雉堞高四丈餘週圍延袤一千五十丈有餘幫修
裏口大牆五百九十餘丈俱用甃甃門樓穿廊券洞
水道各極壯麗 明設叅將一員中軍守備一員馬
戰兵九十名步戰兵六十名守兵一百五十名 景
泰元年石彪守備威遠敵圍土城彪用砲擊死百餘
人遁去六年瓦剌寇威遠諸衛夏定遠伯石彪敗之

於磨兒山 天順四年秋八月李來入自威遠總兵
官高陽伯李文素怯懦擁兵退避寇遂抵雁門掠朔
代忻崞砲火徹於浮圖峪東大學士李賢倉卒入奏
乃詔發兵倒馬紫荆以備畿甸命都督顏彪屯紫荆
馮宗屯倒馬寇初見鎮兵不戰意大恣肆已去復來
乃詔二關屯兵悉至雁門寇始退 弘治十三年六
月火篩大節入西路歷威遠左衛駐營朔州 嘉靖
九年秋七月俺答繇黃榆山入威遠守備賈英出陣

邊人亦多之十一年秋七月繇臘鷄屯入威遠二十九年復入威遠伏驍騎鹽場而以二十騎挑戰陽和總鎮馬芳知其詐用百騎薄伏所三分其軍銳以次擊之奮勇跳盪敵騎辟易十里斬九十級隆慶四年俺答犯威遠堡別部千餘騎攻靖魯大同巡撫方逢時伏兵却之隆慶中俺答攻平魯叅將張剛賂之令移攻威遠幾破總督陳其學率胡鎮等救而大同總兵馬芳兵亦至相持十餘日乃走于謙備邊疏

令遊擊將軍石彪將所帶官軍內威遠衛留一千馬
邑所留六百山陰所留五百名在此巡哨 楊鼎大
同事宜疏山西新設威遠衛與大同相隣右衛三面
幾四百里威遠三面僅六里難以種牧宜以隣近大
同右玉林二衛餘里內西南各撥二十里東北各撥
一十五里給威遠衛軍種牧

此新威遠
城時道里

樊皮嶺在威遠衛明嘉靖四十五年叅將崔世榮戰沒

於嶺 威遠城巡檢司

威平堡威遠城西南 明嘉靖四十五年建萬厯元年
石包周一里四分高連女牆三丈七尺萬厯二十三
年又接建土堡一座火路墩一十座今裁併

小峪口

雷公山西八里盤踞百里南連雲石堡山西北脊連邊
外

牛心山東南四十五里牛心堡南明嘉靖三十七年建
堡隆慶六年石包周二里五分高連女牆三丈五尺

火路墩一十八座山遞高八里旋折而上孤峰插雲
盤踞數里巔平麓圓 成化十九年秋亦思馬因入
掠大同西路叅將莊鑑邀其歸路戰於牛心山敵遂
遁非垣北牛心山也

朔州

石碣峪南七十里翠屏山東峪中有千佛寺東北即神
武尖山 翠屏山西南七十里寧武縣界東至石碣
峪北接馬駿山南通寧武軍山口西至托邏臺高下

往復二十餘里盤踞二百餘里 宋雍熙三年五月
詔遷雲應寰朔四州之民於內地令都部署潘美等
以所部兵護之時遼國母蕭氏與其大臣耶律漢寧
南北皮室及烏雅特哩袞領衆十餘萬復陷寰州雲州觀
察使副部署楊業謂美等曰今遼兵益盛不可與戰
朝廷止令取數州之民但領兵出大石口路先遣人
密告雲朔州守將俟大軍離代州日令雲州之衆先
出我師次應州遼必來拒即令朔州民出城直入石

碣谷遣强弩千人列於谷口以騎士援於中路則三
州之衆保萬全矣西上閣門使王侁曰但趨雁門北
川中鼓行而往業曰不可此必敗之勢也侁曰君侯
素號無敵今見敵乃逗撓不戰乎業曰業非避死蓋
時有未利今君責業以不死當為諸公先乃自石匣
路趨朔州泣謂美曰此行必不利業太原降將公當
死上不殺寵以連帥授之兵柄今當先死於敵因指
陳家谷口曰諸君於此張步兵强弩為左右翼以援

俟業轉戰至此即以步兵夾擊救之不然無遺類矣
美即與旆領麾下兵陣於谷口遼山西兵馬都統耶
律色珍遣副部署蕭達蘭伏兵路側自擁衆為戰勢
遇業兵佯敗業追之伏兵四起色珍還兵前戰業大
敗退趨狼牙村旆自寅至巳使人登托邏臺望之以
為遼師敗走欲爭其功即領兵離谷口美不能制乃
緣交河西南行二十里俄聞業敗即麾兵却走業力
戰自午至暮果至谷口望見無人即拊膺大慟再率

帳下士力戰身被數十創馬重傷不能進遂為遼所擒其子延玉亦沒焉麾下淄州刺史王貴等胥力戰死無一生還者業不食三日卒 遼聖宗紀統和四

年七月丙子樞密使色珍奏復朔州擒宋將楊繼業元攻朔州州人楊沃衍率族人保南山茶杞溝金以為武朔刺史時武州已殘破宋嘉定七年二月元復來攻死戰二十七日元兵乃退 八月金順義軍節度使吳僧格復朔州 吳僧哥乞糧議者以雲應

已破朔州孤城勢不可久又楊沃衍在武州元兵攻圍甚急宋嘉定九年三月金遷武朔吏民入關分置嵐石絳解之間元兵追擊之僧格為殿戰死

神池口西四十里神池界路通神池縣明正統十三年置巡檢司後裁東南有土城基 舊志神池口州南九十里

青圪塔南四十里又十五里至陽方口岔道出西南十五里至大水口 遼志朔州順義軍下節度本漢馬

邑縣地元魏孝文帝始置朔州在今州北三百八十里定襄故城葛榮亂廢高齊天保六年復置在今州南四十七里新城八年徙馬邑即今城武成帝置北道行臺周武帝置朔州總管府隋大業三年改馬邑郡唐武德四年復朔州遼升順義軍節度兵事屬西京都部署司按此則青圪塔南即齊朔州新城地蓋以南蔽陽方口也

陽方口南五十里寧武縣界 舊志寧武軍口南一百

里路通寧武縣南連靜樂縣分水嶺 托邏臺寧武

山前宋王侁使人望楊業也

蕎麥川在州西繇州西至魚渠嶺三十五里繇魚渠嶺西南二十五里至利民堡脊蕎麥川也為神池緊衝趙坡西南四十里踰坡為大水口

朔州內邊長城東南接馬邑城外西南界起迤南而西經寧武縣陽方口至神池縣大水口界共袤百一十里有奇

劉家口北三十五里至井坪界四里

沙峪在州北

下水角在州西北八十里 上水頭在州西北九十里

胥土坡通口外朔州要道也 景德元年秋府州

刺史折惟昌入朔州界破狼水砦時契丹方圍岢嵐

軍聞敗遁去 韓守英從征河東數奉詔至石嶺關

督戰取隆州遷殿頭歷并代路兵馬鈐轄契丹圍岢

嵐軍守英與鈐轄張志言知府州折惟昌師所部渡

河抵朔州以牽賊勢遂破狼水寨俘數百人獲馬牛
羊鎧甲以數萬計寇為解去 繇府谷入朔州當繇
此道 嘉靖四十二年俺答五萬騎至朔州川巡撫
萬恭與戰老高墓列車為陣發火器寇少却忽風起
火反焚車遂復大至諸將殊死戰乃去

武州塞通典朔州有秦馬邑城武州塞 趙武靈王築
長城自代並陰山下至高關為塞而置雲中雁門代
郡 正義括地志云趙武靈王所築長城在朔州善

陽縣北按水經云百道長城北山上有長城若頽毀
焉亘嶺東西無極蓋趙武靈王所築也 後魏李崇

曰朔州乃白道之衝若此不全則并肆危矣 蘇秦

說韓宣惠王曰韓卒之劍戟皆出於冥山

註冥山在朔州北

小代堡在賈莊南 安子堡賈莊東南 王東堡安子

堡東南雁門關北 神武堡在州南 王萬堡在州

西南神武堡西寧武關東北

馬邑縣

太和嶺西南五十里一名惡陽嶺邑志唐貞觀四年李靖率勁兵自馬邑進屯惡陽嶺即此李靖為代州道行軍總管率勁騎三千繇馬邑出其不意直趨惡陽嶺以逼之頡利可汗見官軍奄至大驚曰兵不傾國來靖敢提孤軍至此於是帳部數恐靖縱謀者離其腹心夜襲定襄破之可汗脫身遁磧口退保鐵山帝曰李陵統步卒五千至漠北然卒敗降其功尚得書竹帛靖以騎三千蹀血寇庭遂取定襄足澡吾渭

水之耻矣 綱目集覽匈奴南界磧口之地在賀人
山西按賀人山即今右玉賀蘭山也古隸馬邑郡
祝志嶺北口西山上有佳吉寨宋楊將軍屯兵處
六郎寨南五十里址存 後魏皇始元年八月己亥
大舉討慕容寶帝勒六軍四十餘萬南出馬邑踰於
勾注旌旗絡繹二千餘里鼓行而前民屋皆震 太
和十七年五月襄陽蠻酋雷婆思等率一千三百餘
戶內徙居太和川 唐貞觀中薛延陀衆二十萬度

漢屯白道川據善陽嶺以擊李思摩部思摩引其種
落走朔州延陀乘之及塞太宗令張儉李勣等數道
擊之誠曰延陀經途數千馬已疲瘦吾先勅思摩燒
薙秋草頃偵人來云其馬畜齧噉林木枝皮畧盡卿
等不須前戰俟其將退一時奮擊制勝之舉也先是
延陀擊沙鉢爾及柱爾皆以步兵勝將來寇先教習
步戰每五人以一人習戰者使執馬而四人前戰勝
則援馬以追奔失於應接者死至是行其法思摩先

合輒退延陀乘勝逐之勦兵拒擊延陀弓矢俱發傷
戰馬勦令去馬步陣率長稍數百為隊齊奮以衝之
其衆潰散副總管薛萬徹率數千騎收其執馬者其
衆失馬莫知所從因擊之乃大敗 元設太和嶺千
戶所秩正五品達魯噶齊一員百戶六員彈壓一員
於大同路馬邑縣本隘置司

廣武站東南六十里雁門關下至廣武即馬邑界 廣
武站東南八十里韓王信屯廣武漢兵大破之即此

漢為縣隸太原郡

覆米堆廣武站西北三里砂土二百餘堆不為大風洪水之所剝削相傳楊將軍覆米其上

下關城西三十五里有土堡舊傳堡東一里許又有城周八里址尚存 縣志下關城東南三十五里城址周八里 府志在鴈門關之下因以下關名

大峪口北六十里懷仁界

洪濤山西北十五里朔州界路通井坪所有盤道梁墩

西北二十五里有喇河口墩

桑乾鎮隋開皇中朔州總管郭衍築桑乾鎮 隋大業
末鴈門丞陳孝意虎賁郎將王智辨合兵圍劉武周
桑乾鎮突厥與武周共擊智辨破之孝意奔還鴈門
鴈門人殺之 古桑乾鎮在今洪濤金龍間蓋恃水
為固也

馬邑內邊長城南自縣境接代州界起迤南而西至朔
州界止土丘蔓延共袤八十餘里

左雲縣

朔平府長城東北自府境邊界接大同府大同縣邊界
拒牆堡起西至府境左雲縣邊界拒門堡二十里西
至助馬堡二十里西至威魯堡六十里西至寧魯堡
二十里西至右玉縣邊界破虎堡三十里西至殺虎
堡六十里西南至雲石堡六十里西南至平魯縣邊
界大水口堡五十里南至敗虎堡二十里南至阻虎
堡二十里西至寧武府境偏關縣水泉營邊界六十

里止共袤四百一十里

左雲長城東北自縣境拒門堡邊界接大同府大同縣邊界起西北至寧魯堡邊界交右玉縣破虎堡邊界止共袤一百五里 左雲城營在腹裏 舊邊墩二十四座火路墩五十二座今裁併

破魯堡營分管邊牆東自拒牆堡邊界起西至助馬堡邊界止袤一十五里二分 舊邊墩二十三座今邊墩八座 舊火路墩五座今同

助馬堡營分管邊牆北自拒門堡邊界起南至威魯堡
邊界止袤三十四里六分 舊邊墩二十五座今邊
墩四十座 舊火路墩八座今同

威魯堡營分管邊牆東自助馬堡邊界起西至寧魯堡
邊界止袤一十六里三分 邊墩一十六座 舊火
路墩八座今火路墩一十六座

寧魯堡營分管邊牆東自威魯堡邊界起西至破魯堡
邊界止袤一十九里九分 舊邊墩三十三座今邊

墩一十一座 舊火路墩一十二座今同

明破魯堡制逐魯一墩破魯堡界首東接大同鎮河堡
十六墩北倚石梯子對水泉又西三墩北對深溝又
西為四墩北對窩溝又西為七墩長城址南有土溝
北為助馬堡在垣之外重垣之內有關堡北倚陡嶺
又西為八墩北對馬邑山又西為九墩北對黃土坡
南直河外高山城又西為十墩北對馬頭高峰又西
為黃土破墩青土破墩北對小團山南直破魯堡界

止為垣二十七里

明滅魯堡制安民墩滅魯堡界首東接破魯堡青土墩
北有保安堡在垣之外重垣之內重垣至堡止堡北
對海東山又西歷三墩至太平墩又歷二墩至永樂
墩北對雙山又西為管家溝北對蘆草溝鴉兒巖又
西歷二墩至東坡北對尖山兒又西為西坡有堡堡
外有護堡垣堡有鎮邊關南直滅魯堡北對沙嶺兒
又西歷二墩至穴川墩北對寨兒嶺又西為雙山墩

長嶺墩北對鎮河墩又西為寧魯墩北對八股泉又西為守口墩滅魯堡界止為垣一十七里 今隸助

馬營汛

明威魯堡制界牌墩威魯堡界首東接滅魯堡守口墩西為榆溝又西為水泉又西為舊莊墩西有水口北對尖山又西為衝溝又西為雙井又西為柴堆墩北對密子溝又西為小關乃水口也北對團山又西為雙溝西有暗門又西為東水泉墩北對馬站溝又西

有小關號雙北水口又西為西水泉墩北對定安山
又西為尖山墩南直威魯堡又西為曹家南山墩垣
形彌迤西南北對中土山威魯堡界止為垣一十八
里今隸助馬營汛

明寧魯堡制寧圈墩北對傅家嶺寧魯堡界首東接威
魯堡曹家南山墩西為鹽醬溝又西為大外條墩長
塹止又西為高坡墩雙溝水繇墩東石山出垣暗門
又西為灣坡墩長城沙灣又西為石山墩有小關北

直老武營墩又西為喜鵲墩北對石嘴又西為鎮溝墩有小關水口灣坡至關止又西為寧魯堡關又西為黑石巖南對寧魯堡又西為望川墩北對石嘴又西為稱溝墩北對鎮河墩長城又少灣又西為黑龍王墩寧魯堡界止為垣一十七里 今隸威魯堡汛左雲縣在腹裏明左衛制水泉兒墩大同左衛界東接寧魯堡黑龍王墩西為屯軍溝長墩北對屯田北山又西為屯軍西長墩北對三山又西為左衛二小關

乃水口也又西為左衛關又西為十家莊窩又西為王茂山墩南直大同左衛城北對水海又西減劉東山柴堆山又西為堂于山墩北對樺皮溝又西為王家中西嘴墩北對師婆塞王家中西嘴墩至馬堡北馬尾山東墩脊有塹馬尾山西墩又有塹塹中如小水口古道溝黑龍王灘山寨溝劉隅子溝等與兔毛河形勢相似又西為盤溝北對雙廟又西為半坡墩大同左衛城界止為垣一十七里 猪兒窰左衛城

北對十家莊窩又北對水海 明嘉靖二十年七月

俺答繇左衛猪兒窰入南抵太原

破魯堡東六十里大同縣西北七十里東至大同縣界

一十五里西至縣治六十里南至高山堡三十里北

至助馬堡二十里西北到威寧堡三十里 明嘉靖

二十二年建堡方一里高三仞厚二仞餘門樓一萬

厯元年展修周三里二分有奇高連女牆四丈二尺

輒包 明嘉靖二十三年三月總督翟鵬鑿長塹總

兵周尚文議於塹內城滅魯靖魯破魯威魯寧魯五
堡募邊人為軍墾地堡置把總指揮統之後於破魯
堡分駐守備一員 舊破魯堡界今助馬營界也
破魯堡在塹內助馬堡在塹外明破魯堡東接鎮河
堡而又西至助馬堡汎界故列於助馬之先

助馬堡

連拒馬堡

在縣東北大同縣西北九十里東至鎮川

堡七十里西至邊牆二里南至破魯堡二十里北至
邊牆八里 明嘉靖二十四年建方一里高三仞厚

二仞餘門樓一萬厯四年展修周二里四分高連女
牆三丈八尺 明嘉靖二十四年八月巡撫詹榮總
兵周尚文復議於弘賜諸堡北添設軍堡以相犄角
遂廢水口堡改名鎮羌廢宣寧縣改名拒牆廢亂草
營堡改名拒門又增築拒馬堡各募軍屯守鎮羌拒
馬設守備拒牆拒門設把總指揮統之後於助馬堡
分駐守備一員 助馬路巡檢司

國朝雍正七年巡撫覺羅石麟 題請設巡檢司一員

與武職互相稽查九年復題請將懷仁營改設之都司歸併附近助馬路叅將兼轄與高山營成犄角之勢

拒門堡東北一百二十里在助馬堡東北大同縣拒牆堡界也明萬厯元年磚包周一里零二百五步高連女牆三丈七尺舊分管邊牆沿袤一十五里三分邊墩二十三座火路墩七座今裁併明鎮羌拒牆拒門拒馬所謂塹外四堡也長城東北自拒門堡邊

界接大同拒牆堡界起西北至寧魯堡邊界接右玉
破虎堡界止沿邊共袤一百五里

溢水口東北一百二十五里助馬堡 雍正九年巡撫
石麟疏助馬一臺水口實名溢水口拒門口在南溢
水口在北相隔七里俱係倚邊開門邊民耕種收穫
各由相近口出入其拒門一口寬敞平坦人畜車輛
出入頗便至溢水口原為洩水而設邊民就便行走
而車輛馱載從此出入震動搖撼不無損壞邊牆之

虞應令附近民人帶有農器者春秋兩次放行平時關閉其車輛馱載概由拒門口出入不得混行

保安堡在助馬堡東南破魯堡東北明嘉靖二十四年建萬厯元年甃包周一里五分高連女牆三大五尺舊分管邊牆袤一十四里零邊墩一十四座火路墩四座今裁併

高山堡東南六十里東至大同縣治六十里西至縣界三十五里南至懷仁縣治六十里北至破魯堡三十

里西北到縣治 明天順二年建堡方二里高三仞
厚二仞餘門樓二嘉靖十四年改建周四里三分高
連女牆四丈二尺萬厯元年甃包舊火路墩一十六
座今火路墩一十座 明分駐守備一員 許論九
邊總論高山聚樂二城堡在鎮城兩腋間實為東南
要衝 明楊博疏一經畧左衛左衛至高山站六十
里合無於中路繆官人屯築大堡一座二十里舖舊
高山城各修築小堡一座高山站至鎮城六十里於

適中岡家灣築大堡一座白廟兒屯石佛寺各修築
堡一座公廳營房等項以次修建一增設官兵議得
繆官人屯岡家灣各設操守一員仍各提調東西二
小堡各募軍五百名各給馬一百匹以備往來傳報
之用每小堡各設把總官一員一查處荒田左衛達
鎮城官路東西盡昏腴田議令官軍開墾暇日修理
原設墩臺地方人隨堡住種聽從其便 陳子龍曰
是年楊襄毅所築大小土堡九座墩臺九十二座又

濬大壕二道各長十八里邊民大悅 高山城巡檢
司雍正八年設

馬頭山北三十里東連大同西接右玉迤邐八十餘里
陟巔則垣外豐州灘威寧海松樹諸山胥在指顧中
長城踞其上一名長城嶺形似馬首雙耳尤肖盛暑
堅冰不生樹木

彌陀山北四十里東西袤百里北連口外嘉靖二十七
年八月俺答伏兵五堡旁誘指揮顧相等出圍之彌

陀山總兵官周尚文急督副總兵林椿叅將呂勇遊擊李梅及二子君佐君仁出塞援圍始解相及指揮周奉千戶呂愷郝經等已陣歿尚文轉戰次野口伏突起殊死戰斬其長一人相持月餘乃引去尚文設伏殺其殿卒而還

叅合口水經注沃水又東逕叅合縣南魏因叅合陁以名也北俗謂之倉鶴陁道出其中亦謂之叅合口陁在縣之西北即燕書所謂太子寶自河還師叅合三

軍奔潰即是處也魏立縣以隸涼城郡西去沃陽縣
故城二十里 鹽池在沃陽縣故城東北六十五里
而叅合縣在沃陽縣故城東二十里今左雲縣北有
鹽海則叅合口即馬頭山北口也 晉太元二十年
燕建興十年也夏五月魏侵逼附塞諸郡甲戌燕主
垂遣太子寶及遼西王農趙王麟等率步騎八萬自
五原伐魏范陽王德陳留王紹別將步騎一萬八千
為寶後繼秋七月魏張袞聞燕軍將至謂魏主曰燕

徂滑臺長子之捷竭國之資力以來有輕我之心宜
羸師以驕之魏主從之徙部落畜產西渡河千餘里
以避之寶軍至五原降魏別部三萬餘家收稼田百
餘萬斛置黑城進師臨河造船為濟具魏遣右司馬
許謙乞師於秦八月魏治兵於河南九月進師臨河
連旌沿河東西千有餘里寶列兵將濟暴風忽起漂
其船數十艘泊南岸魏獲其甲士三百餘人又使陳
留公元虔將騎五萬屯於河東要山截谷百餘里以

絕其左東平公元儀將騎十萬屯於河北以承其後
畧陽公元遵將騎七萬絕其中山之路時秦遣楊佛
嵩救魏兵亦至寶愈大恐冬十月辛未燒船夜遁時
河水未結寶以魏兵必不能渡不設斥堠十一月己
卯天暴風水合魏引兵濟河留輜重選精銳二萬餘
騎急追之寶軍還次叅合忽有大風旋黑氣來臨覆
軍上沙門支曇猛言於寶曰風氣暴迅魏軍將至之
候宜遣兵禦之寶以去魏軍已遠笑而不納曇猛固

請不已范陽王德勸寶從曇猛言寶乃遣麟率衆三萬為殿以禦非常麟以曇猛言為虛縱騎遊獵不設備寶遣騎還伺魏兵騎行十餘里即解鞍寢卧魏兵晨夜兼行乙酉暮至叅合寶軍在陂東營於蟠羊山南水上靳安曰今日西北風勁是追兵將至之應宜設警備兼行速去不然必危寶乃使人防後寶先不撫循軍無節度將士不覺魏軍在近丙戌昧爽魏兵齊進日出登山下臨燕營燕軍晨將東引顧見軍至

士卒大驚擾亂奔走魏縱兵擊之燕軍走赴水人馬相騰躡傷者萬數魏畧陽公遵以兵邀其前燕兵四五萬人一時放仗斂手就擒其遺迸去者不過數千人而已 魏太祖幸河南宮乃進師臨河築臺告津奮揚威武連旌沿河東西千有餘里 慕容垂留慕容德守中山自率大衆出叅合鑿山開道次於獵嶺遣慕容寶慕容農出天門征北慕容隆征西慕容盛踰青山襲魏陳留公泥於平城陷之收其衆三萬餘

人而還垂至叅合慚憤寢疾乘馬輿而進過平城北
三十里築燕昌城而還寶等至雲中皆引歸或有叛
者奔告魏曰垂已亡魏又聞叅合大哭以為信然乃
進兵追之知城已陷而退還館陰山 平城東有高
柳塞西有叅合口蓋防大同縣北境之平曠而壯左
右翼以維持之也

威魯堡明嘉靖二十二年建萬厯元年甃包周二里六
分高連女牆三丈五尺舊分管邊牆沿長四里三分

邊墩六座火路墩一十座今裁併

滅魯堡東北四十里大同縣西北一百里東至邊牆三里西至寧魯堡二十里南至縣界十五里北至邊牆二里東南到破魯堡三十里西南到縣治四十里

明嘉靖二十一年建堡方一里高三仞厚二仞餘門樓一萬厯元年展修周二里二分零高連女牆三大八尺餘輒包分駐守備一員

三屯堡威魯堡西左雲縣西北明隆慶三年建萬厯六

年磚包周七分高連女牆四大舊分管邊牆袤一里七分邊墩三座火路墩一座今裁併

寧魯堡北二十里大同縣西北一百二十里東至威魯堡二十里西少北至右玉縣治五十里南至縣治二十里北至破虎堡三十里 明嘉靖二十二年建方一里高三仞厚二仞餘門樓一萬厯元年展修周二里七分高連女牆三丈八尺輒包

吳家口南六十里西連四峰山 四峰山南六十里連

吳家窰東山 明嘉靖二十一年七月俺答繇左衛
吳家口入歷太原汾州抵平陽

雲西堡在腹裏明嘉靖三十七年建萬厯二十四年輒
包約周一里四分零高連女牆四丈一尺舊火路墩
九座今裁併

雲岡堡在腹裏明嘉靖三十七年建萬厯元年改建于
岡上周一里四分零高連女牆三丈五尺舊設火路
墩八座今裁併

紅羊峪南四十里四峰山旁最稱險隘相傳宋楊業屯兵於此

明成化六年築長城起大同左路至偏頭關界六百里
平魯縣

平魯長城東北繇縣境大河堡邊界接右玉雲石堡界
起西南至敗虎堡邊界接偏關水泉營界止共袤一
百五十里

大水口堡營分管邊牆自敗虎堡邊界起至敗虎堡十

六墩邊界止袤三十里 舊邊墩二十五座今邊墩
八座

敗虎堡營分管邊牆北自大水口邊界起南至阻虎堡
邊界止袤二十九里一分 舊邊墩五十一座今邊
墩一十七座內雙碾墩在堡正西四十里崇禎十年
築邊牆上下二層高四丈周一十六丈內建房一十
九間石牕一十四孔門裏以鐵四面女牆頂建關聖
廟樓臺高聳遠覽塞內外數十里為駐防要地 舊

火路墩一十九座今裁併

阻虎堡營分管邊牆北自敗虎堡邊界起南至乃河堡邊界止袤八里五分 舊邊墩一十一座今邊墩四座 舊火路墩四座今裁併

乃河堡營分管邊牆東自阻虎堡邊界起西至五眼井堡邊界止袤三十一里 舊不設邊墩今邊墩一十九座 舊火路墩一十六座今裁併

明威虎堡制堂子山墩北接威遠衛周二河墩威虎堡

界首又南為莊窩長城少凸而西東直威虎堡又南為徐四嶺又南有大水口關又南為大水口又南為界牌梁墩而直倚山威虎堡界止為垣七里

明敗虎堡制大口子墩敗虎堡界首北接威虎堡界牌梁墩又南為紅石嘴長城凸而西又南為緱家堂子墩敗虎堡界止為垣五里

平魯縣在腹裏明平魯衛制呂公山墩平魯衛界首北接敗虎堡緱家堂子墩南為侯家北山西直垣外青

塚又南有關又南為將軍溝西對舊巖又南為營盤山又南為泉兒梁長城少凸而西西直李陵碑東直平魯縣城又南為黃花山又南為陡嘴子長城凸而西又南為響水北山墩又南為艾蒿溝少凸又南為野猪溝少凹溝號極衝又南為大水口又南為勝山兒墩西對賊人嶺平魯衛界止為垣一十里

明迎恩堡制余坡墩迎恩堡界首北接平魯衛勝山兒墩又南為永安墩西直舊單于城又南為樊家溝泉

兒溝又南有小水口少凸又南為黃土坡西對黃嶺
又南歷二墩至鎮溝又南為長勝墩迎恩堡界止為
垣七里

明阻虎堡制雙山墩阻虎堡界首北接迎恩堡長勝墩
又南為鶯架山坡勢迤西西直中平山東直破虎堡
又南為鎮坡墩長城凸而西阻虎堡界止為垣三里
明井坪所制芍藥坡墩井坪所界首北接阻虎堡鎮破
墩南為長溝又南為老鑄嘴長城凸而西西對西平

山又南為鎮溝鎮泉二墩又南為鶯窩山又南為三
岔口又南為安寧墩長城勢西接墳嶺東直井坪所
城又南為酸茨梁極衝又南為鎮寧墩西直舊雲內
城井坪所界止為垣七里 今隸阻虎堡汛

明滅虎堡制杜家莊窩墩滅虎堡界首北接井坪所鎮
寧墩南為鎮川墩長城少凸東直舊迎恩堡制又南
為杜家北山長城少凸而東西對塞兒嶺又南為西
莊窩又南為雙碾墩有關并護關方垣滅虎堡界止

為垣八里 今隸阻虎堡汛

明馬邑縣沙窰墩北接井坪所滅虎堡界雙碾兒墩為
馬邑界首南為土溝子西直舊玉林城又南為井溝
又南為平窰長城少凸而西又南為大南梁又南為
平安墩微凸東直阻虎堡又南為勝水又南為舊寺
兒墩微凸又南為新寺兒墩又南為寺懷墩西直三
山縣雙碾兒南以近猪兒窰故墩滋多也又南為大
溝南山墩西直舊雲川城又南為猪兒窰極衝又南

為後溝沙嶺又南為中溝沙嶺墩西直暖會口要道
馬邑界止為垣二十九里 今隸阻虎堡汛

明山陰縣前溝沙嶺墩北接馬邑縣中溝沙嶺墩中溝
前溝二沙嶺乃暖會口之衝也山陰界首南為大窰
又南為南沙溝長城凹而東中溝前溝南沙溝水勢
遠不及兔毛河而其為通口外之徑一也又南為姚
洪窰墩凸西直舊蘇武城東直滅虎堡又南為西沙
嶺兒西直路口又南為王家莊窩又南為北沙河墩

微凸西直舊鎮魯城又南為楊家北山墩又南為楊家大溝又南為碾兒莊窩墩微凸又南為觀音山墩又南有關又南為西井墩又南為曹家窰北山墩微凸山陰界止為垣二十九里 今隸乃河堡汛

明朔州衛半坡墩北接山陰界曹家窰北山墩朔州衛界首南為曹家窰墩又南為曹家山又南為青陽林又南為鎮靖墩西直神水湖又南為黃草梁墩又南為廟堂山墩微凸又南為石會梁長城勢迤東又南

為栢楊林秀才林又南為杏兒山西對崖頭明時垣
外品窖掘至巖頭止又南為界牌梁又南為響石溝
又南為碌軸墩西直舊東勝城又南為石垛梁又南
為鎮夷墩又南為大溝西對舊牛營兒又南為樺林
兒迤東之垣勢盡矣明內邊垣始此繇此而東南即
寧武雁門以至倒馬紫荆之隘也又南為了角山墩
西對了角山長城勢復迤西朔州衛界止為垣二十
五里了角山墩乃大同山西二鎮之界也垣至墩為

南盡又南為老營堡五眼井墩長城復折而西

威虎堡明嘉靖二十三年建方一里高三仞厚二仞餘
門樓一萬厯九年甃包周一里五分有奇高連女牆
四丈二尺崇禎十三年重建周一里六十步高連女
牆三丈五尺內東十八墩西十九墩兩墩對峙各建
甃樓中有水口湯溪河暨近堡諸水胥繇此流水口
外西入黃河後分轄邊牆袤一十里三分設邊墩一
十三座火路墩一十座今裁併

大水口堡西北四十里大同路西二百十里東至威遠城五十里西至邊牆二里南至敗虎堡二十里北少東至雲右堡二十五里

七墩口北五十里今塞

磨兒山北五十里山形險峻周環似磨明初把禿王轉戰數日斬於山下死者萬騎

敗虎堡西少北三十里大同府西二百四十里東至平魯衛三十里西至邊牆五里南至阻虎堡十五里北

至大水口堡二十里 明嘉靖二十三年建方一里
高二仞厚二仞餘門樓一隆慶六年展修周一里五
分高連女牆三丈六尺磚包 明隆慶四年九月把
漢那吉扣敗虎堡求入戊子至鎮城十月俺答率數
萬騎軍平魯邊外樹雜色幟白如荼朱如火黑如墨
洎鮑崇德約定麾騎辟一舍

鎮川口縣西三十里今塞

野猪溝明平魯衛長城制艾蒿溝南為野猪溝又南為

大水口 鄧亨疏寧武關設在朔州西南其地名野
豬溝搭達沐河等處俱在本關西北相去一百六十
里與偏頭關老營堡地方比肩聯絡正與暖會口要
路相連觀其城池似乎偏僻究其地方其實衝要
明翁萬達疏自紅門隘口起東至野豬溝止為垣一
百二十里有奇削崖垣九里有奇增添敵臺二百六
十六鋪屋六百七十二水口四十四自野豬溝起東
至石湖嶺止為垣一百六十里有奇增添敵臺九十

二舖屋二百七十六水口三暗門二 明萬恭疏自
平魯而西至於老營朔州乃河一帶絕無人烟則鴈
門關之道路遂塞陽方口之門戶大開老營堡之糧
草不通野猪溝之邊患日逼先年邊報由大同左右
衛及威遠威遠及平魯平魯及乃河乃河及老營頃
刻可到防禦易施今烽火不能自東經西必自北樓
迂道請自老營東二十里為賈圪坨又東二十里為
乃河又東二十里為顧家店又東二十里為平魯衛

修舉廢堡每堡屯軍五百人每五里為一墩 嘉靖
三十一年俺答數萬騎突神池利民諸堡總兵李涑
率遊擊李良臣邱陞等迎戰於野猪溝驅之出境
翁萬達為總督策大同邊牆六百里而建墩臺於內
如其數後以兵少牆不能守盡撤而守臺嘉靖三十
三年總督許論言兵既守臺則敵攻牆不得用其力
若一入牆率震駭逃散請改築於牆外每三百步建
一臺俾矢石相及其去牆不得越三十步址方四丈

五尺其巔損三之一高亦如之上置女牆營舍守以壯士十人下築月城穴門通出入度工費不過九萬金數月而足詔立從之

迎恩堡明嘉靖二十三年建萬曆七年磚包周一里五分高連女牆三丈七尺舊分管邊牆袤一十里五分設邊墩一十七座火路墩五座今裁併

阻虎堡西三十里大同府西南二百七十里東至縣治三十里西至邊牆六里南至乃河堡四十里北至敗

虎堡一十五里 明嘉靖二十三年建堡隆慶六年
磚包周一里一分高連女牆三丈五尺

井坪所南六十里大同府西南二百八十里東至馬邑
縣界羊圈梁十里又東至懷仁縣西至乃河堡四十
里南至朔州治六十里北少西至平魯縣六十里東
南到馬邑縣 明成化二十一年五月總督軍務余
子俊言威遠至朔州百七十里兵力不能相救且山
西轉運必經之路宜於適中置所築城以通警急乃

置井坪所城方二里高三仞厚二仞餘門樓二調朔
州軍百名為千百戶而以諸州土兵戍之邊塞稱便
潘垣葉淇傳調大同巡撫設井坪千戶所又增築
諸堡 嘉靖五年八月小王子入井坪為西路地中
路叅將李瑾曰是可視為兩家事耶馳兵赴之時西
路叅將劉鎧遊擊李鑑兵先至惶懼不知所出瑾為
申令戒衆合兵置陣先據荷葉山寇數衝突不為動
後以大砲擊其中堅而自督勁騎馳下擊之寇披靡

引去十一月小王子糾套部七萬餘騎繇井坪入掠朔州至偏頭關乃退十三年十月俺答繇芍藥坡入十九年八月革蘭臺結俺答吉囊繇平魯井坪入遂掠太原岢嵐諸處十二月復繇平魯井坪入掠朔州馬邑山陰應州隆慶元年趙全以譚綸在薊鎮善治兵無輕犯薊而大同兵弱亭障稀可以逞乃數犯山西秋復率衆數萬分三道入井坪朔州老營偏頭關諸處邊將皆不能禦長驅攻岢嵐及汾州破石州

殺知州事王亮采屠其民復大掠孝義介休平遙文
水交城太谷隰州間男女死者數萬事聞邊臣蜀治
有差

乃河堡在縣西南大同府西南三百里東至井坪所四
十里西至賈家堡二十里南至朔州界四十五界北
至阻虎堡四十里東南到朔州東北到平魯縣 明
嘉靖四十五年建萬厯元年磚包周一里四分零高
連女牆三大五尺

滅虎堡明嘉靖二十三年建萬厯元年甃包周一里五
分六步高連女牆三丈七尺舊分管邊牆袤一十三
里五分設邊墩二十七座火路墩五座今裁併

汎隸
敗虎

堡隸
乃河

將軍會堡舊名白草坪堡明萬厯九年建二十四年石
包周一里五分有奇舊分管邊牆袤一十七里設邊
墩三十二座界墩一座火路墩七座今裁併

黃草梁縣東南八十里高十五里盤踞百餘里林木茂

密東連朔州懷仁諸山 明嘉靖十一年都御史陳
達請城鴈門諸隘起黃草梁歷白草溝水峪口至平
刑關為石垣高濶以一丈為式 明宣德七年正月

隱克力等繇段家村入總兵李謙設伏於黃草梁擒

之

山西通志卷十二

欽定四庫全書

史部

山西通志卷十三

詳校官監察御史_臣查善長

檢討_臣德生覆勘

總校官進士_臣朱鈐

校對官編修_臣勵守謙

謄錄監生_臣于希賢

欽定四庫全書

山西通志卷十三

關隘

五

寧武府

寧武縣

寧武關古樓煩地據雁門偏頭兩關之中明初為軍屯
景泰元年築城成化二年巡撫都御史李侃言寧武
北臨雲朔西帶偏保最為要衝請設關置守備於是

因遼寧武軍舊名立關弘治間巡撫都御史侯恂復
奏置守禦所轄堡十有二東為大河為陽房為朔寧
北為神池為大水口為利民西北為黃花嶺為土棚
為義井西為寧文為二馬營西南為西鎮而寧文實
倚角寧武以扼西山之險嘉靖十三年都御史任落
自鵬窩梁至達達墩築邊八里二百二十二步砌以
石十八年都御史陳講議陽房要衝迤西脊缺藩籬
乃修復王野梁廢蹟東起陽房口經溫嶺大小水口

神池蕎麥川至八角堡胥築長城凡百八十里且築
且斷土石相半外為壕塹十九年兼轄寧化所二十
二年置三關鎮守總兵官駐寧武轄雁門偏頭二關
二十三年都御史曾銑謂邊牆高厚不逮雁門復增
築焉 明景泰元年築城方四里高三仞厚二仞門
樓三成化元年訖工弘治十一年巡撫魏紳拓故城
周七里一百二十步高二丈五尺下有塹 寧武關
東北至陽方口又北至朔寧堡又北至鵬窩梁堡內

邊垣胥在西 朔州志寧武軍口在朔州南一百二
十里南連靜樂縣分水嶺左編寧武處三關之中援
應東西實陽方溫嶺神池義井之門戶外接八角堡
內維岢嵐 唐志管涔山北有樓煩關按今寧武當
即古樓煩關地 周經寧武關紀寧武古寧武軍也
即軍舊名名關 宋太平興國中潘美兼三交都部
署屯留以捍北邊三交西北三百里地名固軍其地
險阻為北邊咽喉美潛師襲之遂據其地積粟屯兵

以守之北邊以寧 楊博三關兵將疏山西三關先
年以有東勝大同為之屏蔽邊患絕少自東勝失守
漸肆窺視然猶恃有大同未敢深入今三關之警大
異往昔正德十二年則直至陽曲灣今歲則直至交
城圪塔頭若更長驅而入雖平陽潞安俱為蹂踐之
地矣今都御史陳講御史連鑛覆勘具奏臣等議得
神池堡與老營堡委係必爭之地而八角堡介於其
間尤為適中雁門守備當十八隘口之險而北樓口

委為空濶所據各官要於神池老營堡各添設叅將
北樓口添置把總八角堡改置遊擊畫地分守勢成
鼎足據險扼塞誠為長便又要將神池守備改置利
民堡三岔八角俱為裁革水泉營等處設置把總管
領屯種要皆劑量斟酌無不曲當但副總兵既與巡
撫都御史協同行事威權已重欲加都督職銜似難
輕議今俟命下施行巡撫都御史每年秋近仍駐劄
寧武八角以上仍轄雁門兵備五寨以下仍轄岢嵐

兵備庶聲勢聯絡緩急有濟及照東長峪地方係大
同三關兩鎮接境之地極為緊要其建城設兵於兩
鎮既稱有益亦當及早整理方逢時邊關機宜疏
三關俱通寇要區東路自盤道梁夾柳樹燕兒水鵬
窩梁等堡進直犯代忻太原等處西路自滑石澗黃
龍池寺塢堡水泉營等堡進直犯鎮西興嵐等處中
路陽房口王野梁失守少費迂迴可達東路矣葭麥
川野豬溝失守少費迂迴可達西路矣此邊形之大

較也東中二路外有馬邑朔州烽火相接零騎遽難以潛入大舉或數年一至西路邊長二百餘里東自水黃瓊起西至了角山止一百餘里尚在朔州川之內自了角山起西至老牛灣止一百餘里逼隣沙漠大舉憑陵易逞零騎出沒無常御史賀一桂移鎮之說有見於此計寧武離偏關一百八十里正兵營軍馬在三路上著有年勢難他徙其叅遊軍馬果數足勢强大舉雖未能遏絕零騎必可拒堵此移鎮之便

也查兩營軍少一千三百三十四名馬少三千四百
四十二匹而遽移之是總兵亦叅將等也寇豈憚一
總兵官名乎况偏關抵崞縣原平驛二百餘里東路
報警策應恐難猝至此移鎮之未便也先年俺答乘
虛謀陷老營總兵郭琥早得其情由寧武日暮提兵
四鼓即抵其地而堡賴以全是不移與移鎮同也今
該鎮劉國既稱軍馬寡弱東路寫遠合無依其仍駐
寧武遇三路但有聲息星馳調度隨賊堵截 李攀

龍寧武兵備題名記三十七年改雁門為雁平奇嵐
為偏寧明年仍以偏寧為奇嵐兵備以偏老奇嵐河
曲三守備西路叅將老營遊擊地方兵馬屬之雁門
兵備仍駐代州以廣武北樓平刑三守備東路北樓
太原叅將地方兵馬屬之其八角利民神池寧武四
守備中路叅將地方兵馬則以設今道云上谷岳
倫曰山西京師之屏翰三關山西之咽喉 嘉靖二
十六年總督翁萬達議撤山西內邊兵并力守大同

報可巡撫孫繼魯抗章爭曰紫荊居庸山海諸關東枕溟渤雁門寧武偏頭諸關西據黃河天設重險以藩衛國家豈可聚師曠野洞開重門以延敵夫紫荊諸關之拱衛京師與雁門諸關之屏蔽全晉一也今議者不掣紫荊以并守宣府豈可獨掣雁門以并守大同耶兵部是繼魯言上方倚萬達卒如萬達言

陽方口堡在布政司北三百六十五里東至盤道梁堡六十里西至神池堡二十五里南至寧武所界二十

五里北至朔州五十五里 兩鎮三關志寧武據兩
關之中地勢平行便易馳驅陽方口當雲朔馬邑之
衝至為要害雖距寧武為近而緩急常不得力近日
築邊之議首及王野梁至老營蓋先慮也 康丕揚
三關志陽方口晉邊第一要害地 胡松答翟中丞
書陽方口外當雲朔馬邑之衝內通忻代嵐石諸郡
之路至為要害鎮城雖距寧武為近然緩急終不得
力宜以寧武所城移陽方 陳講上議曰西北邊鎮

莫重宣大三關國初急宣大而緩三關以大同足蔽
三關也今時則異矣故必急三關急三關必增戍增
戍必先設險夫雁門有勾注之險偏頭有老營之扼
故增戍必自寧武始陽方口者朔州之大衝也臣願
藉山西民壯夫力而濟以郡縣贖金城是大險不三
月可就從之於是築長城自陽方口始 胡松楊方
堡築城記西蜀陳公講既受命上公提督三關兼巡
撫山西地方乃言於朝曰山西雁門寧武偏頭諸關

為國重鎮東起代之瓶形嶺西暨保德河曲地東西
延袤千有餘里而寧武關之陽方口東西長可百八
十里適當朔州大川之衝平行夷漫雖數十萬騎皆
可成列以進臣查山西諸路民壯可得萬餘忻代五
臺諸郡邑權金歲得數千不足則取諸太原所部吏
民贖鍰費不傷乎正額勞不及於齊民其築之便上
下其奏兵部兵部議如公指無異乃以雁門兵備副
使王鎬察監經費都司署都指揮同知王松太原府

同知邢倫總督工程其下文武百執事並選廉慎而有幹者使攝之經始嘉靖十九年之春三月畢工明年之夏六月東起陽方口經溫嶺大小水口神池蕎麥川迄於八角堡之野猪溝老營堡之了角墩土築惟半餘則斬山之崖為之計長三萬三千一十餘丈可百八十里無論土石並高二丈有奇下廣一丈五尺上廣七尺加四尺為女牆可騎以馳可蔽以擊牆外壕塹深廣之度畧如牆中增敵臺四十三座煖舖

五十五間暗門五座重樓三座護水堤臺稱之包築
流水溝洞百十二處後中丞劉公臬代奉廷議屬予
與叅政張君子立規計工事補築東路三百里按察
司僉事趙君瀛補築西路黃河埝百五十里 灰河
東流經堡北出口 崞縣陽方倉寓陽方口 正德
九年十月寇由陽方口深入至陽曲灣 嘉靖三十
四年俺答入宣大山西俄而自陽方口出總督許論
遮擊於朔州復由王茂山遁 三十九年俺答自陽

方入犯忻州原平石嶺關復由此出以此地梁內梁
外皆平曠無際故設大將於此 趙炳然分布秋防
疏山西總兵統正兵暫駐陽方口一則調度本境一
則便援雲朔副總兵統奇兵仍駐老營一以專防黃
河一以東西勦遏西路叅將統援兵駐水泉營中路
叅將統援兵駐蕎麥川暗門東路叅將統援兵駐廣
武站太原叅將統援兵駐馬蘭口神機司把總統標
兵駐舊廣武白草溝北樓叅將統援兵暫駐長柴嶺

遊擊統游兵暫駐八角堡 王家屏三邊修守記陽
方口西迄小紅溝寨八里又西築八利境之尖山梁
寨十里既成而公視東隅不稱復增築馮家梁寨二
十里屬之王野梁以綰寧雁之界面陽方左右顧兩
臂若畫一矣甌三城陽方神池利民增築土堡一八
角

寧化守禦所寧化所城方二里餘高三仞厚二仞門樓
三明洪武二年築 隋立汾源宮建城周六里四十

一步明洪武二年因舊址東畔倚山坡改建周二里
一百九十六步高三丈一尺池深一丈五尺西南北
三門萬厯三十四年寧武道郭光禔磚東西關城二
座 宋太平興國五年置寧化軍寧化縣隸焉 淳
熙九年金置寧化州 明初置寧化所隸山西都司
嘉靖十九年都御史陳講請改隸寧武從之 宋志
寧化軍四砦 西陽 腦子 細腰 窟谷 明寧
化四堡 石壩 榆會 川湖 大峪屯 寧化十

四寨 馬頭山 吳家溝 小橫溝 牛心 三岔

定河 慈園 楊房 子房 石佛 細窯 灰

窯 石家 賀家屯 明寧化守禦千戶所在靜樂

縣北八十里置正副千戶百戶旗軍三千三百四十

八名 明洪武二年都指揮常守道駐兵寧化所五

年延安侯唐勝宗增築寧化城率千戶唐成勦四大

王部 嘉靖十五年俺答蹂崖頭入至寧化三馬營

寧文堡西一里寧武城處東偏山下臨識者慮其難

守明正德十年兵備副使張鳳趾議城寧文堡於西山共相犄角 尹耕曰寧文城而寧武可守與江左戍石頭意同

樓煩鎮寧化所嶺北有東路南路嶺南有河川天城川西川南川細磨川嶺南北外又有西路北路而樓煩鎮為河川村首乃嶺南第一村也漢立雁門郡樓煩縣元魏建樓煩宮隋唐立樓煩郡唐置樓煩監遼耕陽武砦及寧化火山北地知并州韓琦鑿塹立石

界之

堡口寧武堡口險隘非尋常堡寨比

大河堡在東二里

石湖嶺 石湖水口在東二十里 翁萬達疏曰自石

湖嶺起西至野猪溝止為垣七里塹十之一增添敵

臺二十八鋪屋八十四又自野猪溝起東至石湖嶺

止為垣六里有奇增添敵臺九十二鋪屋二百七十

六水口三暗門二自石湖嶺起東至鵬窩梁小西溝

止為垣六里有奇增添敵臺八十六舖屋二百五十
八品窖七萬六千二百二十四暗門二水口十一水
洞三 石湖嶺堡

野豬嶺堡在縣境

王野梁石湖嶺東明嘉靖二十年八月吉囊繇朔州入
至王野梁副總兵丁璋遊擊周宇戰沒遂深入太原
嘉靖十一年都御史陳達請城雁門諸隘起王野
梁厯白草溝水峪口至平刑關為石垣高濶以一丈

為式

五花營東一百二十里

火燒溝東南十五里

金家背東南八十里

靳家窰東南四十里

夾柳樹堡東南六十里

詳崞縣

小蓮花堡東南七十里

詳崞縣

盤道梁堡東南八十里

詳崞縣

朔寧堡東南二十里 燕兒水堡東南四十里 西溝

口堡東南四十五里 鵬窩梁堡東南六十五里

三馬營堡西六十里 大水口堡北三十五里 石

槽堡 麻峪堡 三岔堡 西嶺堡 馬圈灣堡

黃土坡堡 金家堡 張家堡 梅家堡 楊家堡

東莊 馬營村堡 頭馬營堡 分水嶺寨 八

答窰寨 石嘴頭寨 白馬崖寨 紅村寨 汾河

溝寨 謝家溝寨 白臺寺寨 反口深烟寨 壩

上寨 石莊寨

偏關縣

偏關縣長城東接平魯了角山起西接河曲縣河口鋪止

明老營堡制五眼井墩北直赤山東接朔州衛了角山墩長城復折而西為西山老營堡界首繇東北至右衛兔毛河西墩止胥有長塹又西有關繇關北出有長城塹東起赤山西止廟記山廟記山北乃哈屯不

喇也又西為青草卯墩長城復迤北又西為將臺堂
門耳房胥具南直官河源又西為破魯關又西為垣
內平安口墩又西為阻虎墩南直老營堡又西為拒
虎墩又西為馬頭山長城凸而北老營堡界止長
城自河曲石梯隘起至老營了角墩袤二百四十里
惟船灣斬賊溝娘娘廟石城鋪天險壁立故明時多
未築其築者後亦多頽云 領賈家堡 五眼井堡

馬站堡 永興堡

明水泉營堡制元卯墩東接老營堡馬頭山墩水泉營
界首南直垣內水泉墩又西為將臺堂門耳房胥具
又西為垣內南海子墩又西為黎兒墩微凸又西為
東梁亭長城勢迤南又西為紅門隘口有甕城城北
有關三關鎮市場也甕城北有閘三曰中曰左曰右
近甕城有閘一曰內閘乃市馬之界也隘口內有城
南墩墩東西有石垣限隘口南直八柳樹堡又西為
紅門右墩長城勢迤北又西為護城墩坡勢凸而北

南直水泉營堡又西為護營墩又西為北窰墩脊在垣內南直馬站堡又西為石卯凸而北又西垣內有海子墩又西為石窰垣內有長梁墩又西垣南直乾溝堡又西有墩墩西南垣內又有乾溝墩又西為鎮羌墩又西為滅魯墩又西為石山垣勢附山半南直草垛山堡又西垣內有殺賊墩北直石山劉賊墩又西石山忽缺有垣又西石山復起有垣又西石山復缺有垣又西石山復突兀有驢皮窰墩又西石山復

缺有垣又西石山綿亘垣勢胥附山南直楊家莊墩
又西石山復忽缺有垣又西石山復突兀垣內有青
草卯墩又西為水口兩石山間有垣南直偏頭關城
又西石山復突兀大起垣勢附山垣內有保安墩又
西石山復忽缺滑石澗繇兩山間水門北流又北有
水垣又北又有水垣又北為小口子水垣又北為大
口子水垣胥夾山水門又西石山復起有小口子墩
垣內有滑石澗暗門南直滑石澗堡又西垣內有滑

石二墩又西石山復忽缺兩山澗有水門滑石澗水
繇小口子北流又西石山復突兀大起兩山間有滑
石澗水口垣北又有水口垣又北又有水口垣胥夾
山水口垣西北袁亘娘娘廟垣又西石山復起有垣
折而西又西石山忽復缺兩山間有水口垣又西石
山復起巔有垣北對水北娘娘廟又西巔又有垣又
西為水門墩北對娘娘廟西連山又西有墩又西石
山垣內有龍頭墩北對水北石山巔石門墩又西有

墩又西為小莊窩墩石山少平坦水泉營界止此為
西盡又西老牛灣墩復折而南 領草垛山堡 滑
石澗堡 老營堡水泉營堡一墩多列三四墩故視
朔州衛東北墩數少減其天鎮陽高以西亦有一墩
列數墩者

明老牛灣墩東接水泉營滑石澗堡小莊窩墩老牛灣
界首長城復折而南又南有五墩又南山復突西上
有老牛灣墩又南有官廨南直官河外常樂墩又南

山勢復突西南直官河外河口墩袤至黃河止老牛灣山南乃官河入黃河地也 山西長城東自東界脾墩起西至老牛灣墩止 偏關縣以關為主故先列長城於前

偏頭關漢武州縣地東連了角山西連黃河隔河套裁一水關勢東仰西伏故名 元有偏頭關乃偏頭砦址也嘗置武節將軍樞密院判鎮守明洪武中始設關置守備專勅守關轄堡一十有八關以東為馬站

為八柳樹為老營東北為小營為水泉北為寺瑪為滑石澗西為樺林為樓子營為羅圈為楊晃為唐家會為五花營為得馬水為灰溝東少南為永興東南為八角為長林大邊在關北一百二十里起大同之崖頭至黃河七十里無牆而有界成化三年總兵王璽復於關北六十里起老營了角墩至老牛灣築牆二百四十里號二邊而三牆則在關東北三十里起石廟兒至石梯墩凡七十里嘉靖九年副總兵李瑾

築四牆在關北二里起鷹窩山至教場一百二十里
正德十年兵備道張鳳翔築後復以時增修

國朝雍正三年改偏頭所為偏關縣同城為偏關營領
樓溝堡老牛灣堡 明偏頭所屬城二八角老營堡
所與偏頭為三 偏頭五堡 九梁津 焦尾城

小偏頭村 灰溝 馬營 十三寨 石城 大嶽

伍門樓 甘草嘴 海子 董家 西莊 平泉

大峪 河會 辛家莊 王花 下營 尹耕武

州考古有兩武州其一為州即漢之下落縣今宣府也史曰後魏置文德縣唐陞武州是也其一為縣即漢之武州縣今偏頭關地也史曰單于將十萬騎穿武州塞是也唐總管劉世讓拒高開道進保武州地連懷戎則所守之武為下洛元知院魏賽音布哈兵迫博羅特穆爾扼險偏頭則所駐之武為武州縣也又曰偏關古武州地北為東勝南為奇嵐所謂夾寨溝也北漢主鈞天會元年城偏頭砦於韓廣嶺之

上即今關城也 元庫庫特穆爾討博囉特穆爾紀
功於碑曰移師武之院塞曰偏頭關 明洪武二十
三年鎮西衛指揮張賢改築於西原城近河坪去故
址一里方三里餘高三仞厚二仞門樓三成化元年
都御史李侃展拓周九里八步高二丈三尺 明弘
治十四年以後寇住套中地勢平漫偏頭關逼近黃
河焦家坪娘娘灘羊圈子地方皆套部渡口往來無
虛日保障為難三關要害雖同偏頭尤亟 周經重

修大邊記大同於九十里外築小城曰小邊又於百
里外築大城曰大邊歲久小邊僅存而大邊蕩然矣
弘治辛酉僉都御史劉公宇等協議僉事王從鼎專
事修築工興於夏四月訖於秋八月城廣一丈五尺
高一丈三尺其延亘起西陽河接偏頭關凡九百八
十里其增置斥堠也百加增堡砦也六百有七十挑
鑿坑塹也百萬形勢高深保障復故 項忠覆鄧亨
邊關疏偏頭最為緊要寧武關次之雁門又次之但

山川聯絡烽火接連一處有警彼此皆懼所以鎮守
守備官員一概奏討添兵互相爭執地方緊要此實
通患 又覆御史薛為學防邊疏偏頭有警延綏東
路大同西路雖非統屬必須策應朔代有警偏頭南
路宣府中路雖非管攝隨當掩襲宣大有警本處前
後左右副叅遊守互相邀截其地近朔代如繁興寄
嵐諸邑宜令一體隄備嚴督訓練庶免後艱 總督
宣大翟鵬疏三關中為寧武雁門在東偏頭居西西

鄰黃河逼近河套每遇河凍侵犯嵐靜多由偏關出沒而雁門一帶恃有大同為之屏蔽總督崔鵬題防邊禦寇不過戰守二事守則有要據險守要以一當百戰則有機度地陳兵以逸待勞請東自平刑關西至偏頭關盡境止定擬戍兵畫地分守再設遊兵三枝一在雁門一在寧武一在偏關賊若攻牆戍兵上牆拒敵遊兵出關夾攻所謂守中有戰正中之奇東自大同陽和城西抵山西老營堡徧觀地形詳察

賊路如賊從北來則設兵於左右衛鄉村羊圈頭曹家梁小金莊等處以待之賊從東北來則設兵於懷仁高山鄉村周家莊吳家窰劉按莊等處以待之賊從西北來則設兵於井坪平魯鄉村窯子頭高家堡油房頭南北帳子等處以待之又東於宣大之交三關之界各設勁兵以防奔逸又選慣戰官軍六千員名分為二營臨時會行總督張鳳親自統領隨機應變所謂戰中有守奇中之正北直隸河南山東等處

紫荆倒馬龍泉等關有備亦可無備亦可本兵毛伯溫議行但紫荆倒馬龍泉等關切鄰邊境與直隸河南山東不同必須嚴加隄備使宣大陳兵力戰必不能抵關而攻使三關分牆拒守必不能越關而入

嘉靖二十二年三月總督翟鵬言大同自有五堡北邊少事以恃溝塹也今議自鎮邊堡而東至陽和後口鎮河堡而西至老營堡鑿為長塹其間山險不可鑿處不過三十餘里量為斬崖修牆鑿塹之勞省於

築垣設險之利同於禦寇 總督翁萬達疏偏關地
稱險阻塞亦堅完明水灣雖云盤佳遠難侵軼 三
邊總督王之誥防秋疏延寧二鎮沙漠平行哨卒無
所趨避故套中動靜皆得預知宜與山西偏老互相
傳報 韓邦奇邊事論西北之大邊六宣府最為緊
要額兵十二萬其次大同額兵八萬其餘各鎮兵俱
少於是內外一帶界山自山海至居庸紫荆雁門寧
武寧化岢嵐保德偏關直抵黃河岍自北南視如千

仍崇垣拔地而起固天所以限內外也中古始守於險外以為藩籬居庸紫荆之外有宣府雁門寧武之外有大同國家又設老營堡居庸紫荆雁門寧武皆設兵將寧化以西乃畧而不備秦時城址猶在若考其地而設兵如雁門等處寇必不能長驅而入矣若止從老營堡修至寧武亦不為甚費今寇入邊境惟老營堡地方乃一大空闕異時妄興他志以侵內地惟此塗為便既過老營地方而寧化岢嵐無守則天

門圻口元崗陽方之險不足恃矣偏關之城昔在山麓下若寇乘山而攻旦夕可破移於城西築以甬道長不過二里即至山巔上濶二丈高三丈兩面環一女牆設數鋪房寇至以兵守之金湯之固矣左編乞割偏老以南寧雁以北特設一巡撫專委之以邊計而開府於偏關以總兵駐老營以副總兵駐河曲自平刑北樓雁門寧武而北悉以隸之移寧武道於偏關以為分守而岢嵐保德等州縣專屬偏關巡撫

如朔應之於大同山西都御史罷其軍務但專巡撫
畫關而守之偏關叅將換駐寧武其雁門以北巡按
事宜亦或以并於宣大而山西一應派額應輸三關
者俱仍其舊 尹耕曰詢之境外明水灣柳川鋪火
焰山大黑山松樹山駐帳則必犯偏頭又曰論者謂
偏頭倚大同為援夫了角之西斗灣之東偏守自為
邊也大同何得蔽之 劉龍指揮僉事袁杲行狀瀕
河七堡與延綏大同隔遠瞭望不通公議添設大楊

諸墩一有警報瞬息數百里 尹耕垣塹窖三險議
築土為防曰垣鑿地橫垣曰塹間鑿間否形如品字
有隆有伏互相倚伏曰窖三者垣最可恃窖次之塹
斯下矣何者因高遠眺敵無所逃乘險下拒已易為
力此垣之功也若夫塹則沿守者無所倚蔽眺望者
不獲遠施嘗計一卒挾一束芻則萬衆頃刻之際可
平數丈也窖有隆伏平之反難 明張四維復鄭范
溪書三關為晉障雖均然寧雁外蔽朔應而偏關則

密與套寇為鄰其緩急不同今雁平之塞若盤道梁等處石壁足稱天險而偏頭以西抵於黃河最為剝膚地乃其牆臺猶未足為永賴倘再加料理亦若盤道梁之周此三晉萬年利也

樓溝堡南四十里布政司西北五百里東至永興堡二十里西至河保營九十里南至三岔堡四十里北至偏關城四十里 明隆慶二年兵備范大儒建袤四百二十九丈高三丈五尺

老牛灣堡布政司西北六百一十里東至滑石澗堡二十里西至黃河二十里南至樺林堡八十二里北至邊牆一里 明成化三年總兵王璽築牆崇禎九年兵備盧友竹建堡周一百二十丈高三丈五尺堡東接滑石澗西臨黃河岍首當西北之衝 二邊至老牛灣黃河岍止 垣至小莊窩墩為西盡老牛灣墩復折而南 堡南河口墩乃官河入黃河地也官河南為樺林界 明崇禎九年移寺塢堡防守一員守

兵一百五十名駐堡 翁萬達疏自老牛灣黃河所
起北至水泉營紅門隘口止增添敵臺一百一十五
鋪屋三百四十五 梁斗輝邊防議山西三關惟偏
老沿邊地方自蔽萊昂起至老牛灣止邊長一百一
里有奇添設磚包空心樓實心樓各十五座敵臺二
百一十六座見存城堡墩臺隘口空實敵臺三千七
百一十處 萬恭䟽嘉靖二十一年總兵王繼祖謂
自老牛灣至於險崖河急不凍據牆而防自險崖至

於陰灣河緩始冰廢牆以守而打冰之議起隨打隨
結愈鑿愈堅寇登東崖無牆可拒今議自險崖至陰
灣每年河凍為極衝除濟道溝起止羊道坂四里石
山陡險不必議修應修築者二十餘里又自陰灣起
止石門隘口河多不凍為次衝應修築者亦二十餘
里

常勝山北六十里上有墩石老牛灣堡左滑石澗堡俯
瞰黃河

東長嘴北五十里東西石嘴胥袤五六里河經其中

張士瑄詩石角枕流水曲通界分南北岍西東

萬家寨西北四十五里巨石嶄巖下臨河岍昔人結寨

其上

老營所布政司西北五百四十里東至賈家堡界官河
口一里至賈家堡二十里西至馬站堡界方城坪十
里馬站堡四十里南至八角堡界紅崖子六十里北
至邊牆一里東南到利民堡西南到八角堡西北到

五眼井堡三十里 領賈家堡 五眼井堡 馬站

堡 永興堡 明景泰間都督杜忠建堡成化初修

方五里高三仞厚二仞門樓三 二邊起老營了角

墩 兩鎮三關志偏頭西逼黃河渾脫可以飛渡然

山澗崎嶇難於大舉老營東接平魯去大同邊不遠

使聯絡屯守則八角墩而南陽方口而東烏用是紛

紛也 明老營堡所四堡 長林 長安鎮 大莊

窩 小營兒 老營堡廣積倉 嘉靖十六年八月

俺答繇平魯衛入至老營四十二年俺答用趙全謀
欲夜襲老營結堡中張輝諸賊為內應先一日水泉
營守備陳一言偵知馳報總兵郭琥琥銜枚疾馳堡
上倏易置守門將士以親丁部署甫定而俺答至舉
火為號中無應者扣城中何人曰郭大將軍懼而宵
遁總督翟鵬曰自五堡以至老營堡皆要路也於
斯設險必難飛越韓邦奇欽遵勅諭䟽照得山西
三關一帶沿邊地方寧武以東隘口及沿邊平漫之

處皆有隘可據寧武以西漫然平曠戎騎可以長驅
無阻而原設兵將比之他邊甚少城堡亦甚稀疎臣
等嘗詳察內外之界自大河以西由石隰奇嵐靜樂
寧武至雁門歷紫荊居庸直抵山海關一帶界山崇
岡峻坂中古以來類皆守於險外以為重險之固寧
武以西其險則在興嵐石隰等處古人皆以此地建
節國家亦守於險外置偏頭老營城堡然止設一副
總兵一遊擊并近日巡撫奏設止有四守備騎兵惟

九千餘名而興嵐等處又棄而不守更何所恃以為藩屏哉國家設險禦戎獨偏頭等處乃一大空闕以臣計之哥嵐州實內外之界有險可據宜設一叅將益兵三千神池堡要害之地宜拓一城設一守備益兵五百八角之東寧武之西八角之西偏頭之東適中之地亦各為一堡各設一守備或於五寨前後設立據險以便截殺亦各益兵五百副總兵宜升為總兵惟選謀勇都督領之駐劄寧武其偏頭仍一守備

益兵八百可也提督都御史不必兼理巡撫山西一
省止巡撫沿邊一帶地方忻代保嵐石五州所屬及
雁門石隰二兵備并都司布政司管糧官按察司管
屯官并守巡冀寧道及叅遊守備俱聽節制其餘山
西布按二司府州縣官員賢否軍民詞訟歲辦差役
俱不必管理庶得專意經畧邊事老營堡宜設一所
以管常備新軍其山西汾州等衛所防禦大同官軍
仍掣回山西三關防守遇有緊急與大同互相應援

如此則不惟三關之兵威可振而大同之勢亦遙為之壯矣 王崇古免調援兵疏山西自偏頭關老牛灣黃河東岸起東至老營堡了角墩止共長一百四里是為外邊秋守邊而冬守河極為寇衝又自了角墩起東至平刑關石窯菴止共長七百餘里是為內邊中聯寧武雁門倒馬諸關向恃大同為藩籬脫遇大舉大同不能堵截每繇內邊諸口直犯關南內郡是有兵尚難自固也若復將老營邊兵盡選馬軍遠

戊保安正兵東駐陽方去偏老三四百里一旦寇入
非惟老營不可守即汾石隰吉諸州皆可蹴至矣今
春寇密謀掩襲老營一夕即至幸哨報早聞總兵官
郭琥連夜趨防兵方至城寇即入境內若移駐遠方
馬能速濟近方議總兵移鎮老營免往返勞費豈宜
復聽東援坐失西守且自老營寧武至保安靈尉千
有餘里皆係山程石澗萬一有警士馬疲勞斷難濟
用所以每次議留惟北樓叅將原設援兵不及三千

馬僅二千匹亦可東援乞免調山西正遊兵馬選定
北樓馬軍二千則東西庶可兼濟 明給事中劉東
星計安四鎮疏老營堡孤懸絕塞左控平魯右接偏
關陽方諸口恃為耳目最稱要害而本堡山勢崎嶇
運道險隘即遇緩急難以屯聚援兵轉運糧餉尤為
可慮宜於附近地方如乃河堡等處添設軍伍以備
聲援又於城中多積芻糧以防坐困 老營堡巡檢
司

窖兒塢東北八十里

塌崖溝東北八十五里胥偏頭東北要道

鎮溝樓東八十里亦稱險隘因建敵樓於上

地椒嶺東九十里緊逼東邊

賈家堡

隸老營營

東一百里布政司西北五百六十里東至

大同府乃河堡界二十里西至老營所二十里南至

大同府朔州界五里北至乃河堡界八里 明嘉靖

四十三年兵備王遴建廣一里一百步東接雲朔北

通五眼井堡西接老營河口南通長林火路乃朔寧
二郡咽喉地也 明設操守一員兵三百名後增設
把總一員兵二百二名

五眼井堡

隸老營

東一百里布政司西北五百八十里東

至大同府乃河堡界三里西至水泉營四十里南至

老營所三十里北至邊牆二里 明崇禎十年兵備

盧友竹建周一百丈高三丈五尺堡接了角山最為

衝要 五眼井墩山西老營堡界首垣至朔州了角

山墩為南盡五眼井墩復折而西 總督翁萬達曰
山西起保德州黃河岍迤邐而東歷偏關抵老營盡
境大同起西路丫角山迤邐而北歷北中二路抵東
路之東陽河鎮口臺皆逼臨邊境險在外者也山西
老營堡轉南而東歷寧武雁門北樓至平刑關盡境
又轉南而東為保定界歷龍泉倒馬紫荆之吳王口
插箭嶺浮圖峪至沿河口皆峻山崇岡險在內者也
是故丫角五眼井為外邊內邊之要樞 明設防守

一員兵二百二名後增設守備一員把總一員兵四百名

視遠隘東北一百一十里乃五眼井堡邊隘也在堡西一十五里戍樓遠眺下有石洞名視遠洞 翁萬達疏自石廟兒視遠隘以北起北至周家口止又自視遠隘以南起南至樊家窰止為垣四里

五眼井口東北一百二十里

新窰溝東一百三十里溝通塞外

馬站堡

隸老營營

東四十里布政司西北五百六十里東至

老營所四十里西至偏頭所四十里南至八角堡七

十里北至草垛山堡四十里 明正德十年兵備張

鳳翔建嘉靖二十年廢四十二年兵備王遴復修周

四里高三丈五尺地界偏老水泉三路之衝設遊擊

一員中軍千把總八員兵三千一十四名馬三千一

百三十七匹 嘉靖十五年八月俺答繇寺塢入至

馬站營

永興堡

河曲隸老營營

南四十里布政司西北五百四十里東

南至八角堡五十里西至樓溝堡二十里南至三岔

堡五十里北至馬站堡二十里 明正德十年兵備

張鳳翔建周一里高三丈五尺設防守一員

水泉營堡

舊隸老營今歸縣

東北六十里布政司西北五百六

十里東至五眼井堡四十里西至草垛山堡二十里

南至馬站堡十五里北至邊牆二里 領草垛山堡

滑石澗堡 明宣德九年都督李謙建廣三里一

百七十步置防守一員兵五百名後設叅將兵二千
五百名隆慶二年改設守備把總各一員增兵一千
名馬騾三百匹頭 水泉營在堡城東少南為紅門
口附口外少南有南海子堡城西南有後海子

驢皮窰口東北六十五里徑道平行昔為邊衝而兩崖
胥石山可以制勝

紅門市口堡東北八十餘里布政司西北五百六十里
東至邊牆西至邊牆南至水泉營堡界北至蒙古地

界東南到五眼井堡西南到水泉營堡口近水泉營乃厥溝也明宣德九年都督李謙以溝通塞外建敵臺橋洞一座外設邊牆一道壕塹品窖三層撥軍二十名偵望萬厯二十六年兵備道趙彥增左右雙翼磚臺東有東梁亭明三關鎮市場在水泉營隸奇嵐道順義王諸部互市於此先設宴邊外有閘三曰中曰左曰右馬繇此入臨邊有閘一曰內閘馬繇此登數入境紅門有臺袤一十三丈臺上有納款廳

撫賞於此以銀一萬兩宴餽一萬兩撫賞諸部四萬兩市馬馬以六千為率價以一十二兩為率互市日奇嵐道提調監督雁平寧武兩道協理之鎮守總兵官副將統兵彈壓西路叅將理市事正兵營軍二千一駐老營堡一駐八柳樹馬站游兵營軍移駐滑石澗小營兒獅子坪叅將軍移駐馬站堡以備要衝

草垛山堡

隸水泉營

北少東六十里布政司西北五百七十

里東至水泉營堡二十里西至滑石澗堡三十里南

至馬站堡四十里北至邊牆五里 明弘治十五年
兵備楊綸建後廢萬厯二十二年兵備趙彥復修周
三百八十四丈五尺堡突出崇山直望三十餘里為
沿邊傳烽之首 明設防守官兵三百名萬厯二十
二年增設守備中軍把總胥一員

滑石澗堡

隸水泉營

北六十里布政司西北五百八十里東

至邊牆三里西至老牛灣堡二十里南至偏關城七
十里北至邊牆一里 明宣德九年都督李謙建嘉

靖二年陷於敵隆慶三年兵備范大儒復修周一百八十丈二尺高連女牆四大堡即邊垣也 堡前有滑石澗暗門西有滑石二墩墩西有水門滑石澗自水門北流有小口子墩水出小口子又出大口子水門西又有滑石澗水口西北流出水口門 明置操守一員兵二百五十名隆慶三年設守備一員兵三百七十五名 翁萬達疏自老營堡了角墩起西至滑石澗水門墩止為垣九十里有奇塹如之增添敵

臺四十四鋪屋六十二品窖三千暗門一水口一

水門溝口北七十里滑石澗東上有敵樓下有湧泉稱險隘焉

蚕虎口北七十里滑石澗堡前昔稱邊隘今農民耕塞外田

娘娘廟北一百里石山上下臨溝蹊

黃龍池堡北五十里東距寺瑪堡二十里北通草垛山大邊明弘治間與草垛山堡同建置操守一員兵三

百名後廢

寺塢堡北四十里明嘉靖間總兵李瑾建置防守一員
兵三百名後廢

韓家坪堡東二十里明嘉靖間建置防守一員兵二百
名後廢

八柳樹堡東六十里明景泰二年都指揮杜忠建後廢
小營兒堡東六十里明嘉靖間總兵李瑾建後廢

長林堡東一百五里明弘治間建後廢

好漢山堡東北一百里明崇禎間建後廢

栢楊嶺堡東北九十里明弘治間建後廢

東關河隘口老營城東一里南接利民堡北接紅門東
通平魯井坪嘉靖二十三年建橋洞三座上建重樓
規制猶關西河口後毀

通邊關東北六十里為草垛山迤東為水泉營又東為
老營抵好漢山接平魯縣界南折接朔州界 明成
化二年總兵王璽築東起老營堡之了角墩西抵老

斗灣南折黃河岍抵河曲石梯隘口袤二百四十餘
里成化二十二年兵備郝志義修嘉靖二十三年巡
撫魯銑檄叅政蘇祐兵備劉璽幫築建敵臺二百二
十六座上建鋪隆慶二年巡撫楊巍檄兵備范大儒
等加幫巡撫朱纁覈實萬厯二十五年兵備趙彥又
建空心磚樓并諸隘口敵臺

楊家砦 下鎮砦 星坐驛 峰子塢鋪 壕子塢鋪
寺前墩 關口 浦家灣 銀安口 青天口

黃河渡 焦家坪渡 娘娘灘渡 太子灘渡 羊圈子渡

神池縣

菽麥川口利民堡北 霍冀九邊圖說兵自威遠平魯而下即抵菽麥川奔利民堡 劉龍指揮僉事袁杲行狀守備寧武關議築蕎麥川鎮狐諸堡

利民堡北六十里布政司北少西四百三十里東至朔州治六十里西至八角堡四十里南至神池堡六十里北至邊牆三里 利民堡北出菽麥川口為朔州

井坪孔道

利民堡舊名達沭河明成化十七年

三闕

志十五年

都御史秦紘築土堡方五里餘高二仞餘厚一

仞餘門樓三以指揮防守正德時增展嘉靖十八年

都御史陳講設守備建倉萬厯四年砌石城周三里二百四十步高連女牆二丈五尺利民驛南十里

至南堡又十里至羊房村又三十里又木瓜溝又十

里至縣明正統十三年置神池口巡檢司在朔州

南九十里南有土城址是迂道而西南也至嘉靖十

八年劉神池長城溫嶺蕎麥川磨石山之間塹道不通今蕎麥川口利民堡胥為孔道 嘉靖十八年巡撫都御史陳講以神池利民二地要害築城置守

利民

倉堡內西北隅

翁萬達疏自利民堡勒馬溝起西至八角堡界止為垣三里增添敵臺六舖屋十八

八角堡西北六十里布政司西北四百三十里東至利民堡四十里西至三岔堡五十里南至五寨堡七十里北至馬站堡七十里西南到五寨堡七十里 八

角堡舊名永寧驛明弘治二年僉事王璿築土堡方
四里高三仞厚二仞門樓三嘉靖四年建倉萬厯十
六年磚包周四里九十二步高連女牆二丈六尺城
樓八座故名八座八角驛北至櫻桃鎮十里又至
北沙城十里又至草菴舖十里偏關界楊博三關
疏神池堡與老營堡均係要地而八角堡介於其間
尤為適中若於神池老營添置叅將八角改設遊擊
畫地分守勢成鼎足據險阨塞誠為長便又宜將神

池守備改置利民堡 嘉靖三十二年俺答以萬騎

入大同縱掠至八角堡巡撫趙時春禦之遇敵於大
蟲嶺總兵李洊戰死軍覆 汪道昆許論傳妖民呂

鶴結俺答入公時督府決策擒鶴斬之獻馘四十鶴
既誅寇旋馬西向公敗之紫塞八角堡追襲俘馘百

七十有奇

八角倉堡
內東北隅

黃花嶺南十三里又二里至寧武縣界會城孔道也北
五里至郝家坡又八里至縣 黃花嶺一名摩天嶺

盤踞二十里高四十丈南連寧武縣界東連寧武縣
山唐元和四年夏六月范希朝改授河東節度使
朝議以沙陀在五原近吐蕃命從希朝詣河東希朝
選其驍騎千餘自隨號沙陀軍處其餘衆於定襄川
朱邪執宜乃保神武之黃花堆朱邪執宜居定襄
神武川之新城其部落萬騎皆驍勇善騎射號沙陀
軍太和四年節度使柳公綽以陜北沙陀素為九
姓六州所服請委朱邪執宜治雲朔塞下廢府十一

科部人禦邊號代北行營授執宜招撫使從之一
名達速嶺齊天保五年十二月庚申帝北巡至達速
嶺覽山川險要將起長城

大澗口東五里朔州界大同孔道 寧武自陽方口外
惟收麥川口為北道要衝陽方口內則東郊外大澗
口亦屬要地 遼太康三年北院樞密副使蕭哈爾吉
經畫西南邊天池舊塹立堡砦正疆界刻石而還
乾柴溝北九十里邊牆外偏關神池之界也

趙莊堡西十五里 土棚屯西三十里 大黑莊西五

十里 銀洞窰西北三十里 義井堡西四十里

劉海莊西北四十里 嚴佩鎮西北四十里有大小

二鎮 櫻桃鎮西北七十里 得勝堡北五十五里

五寨

三岔堡北六十里布政司西北四百六十里東至八角

堡五十里西至河曲縣九十里南至岢嵐州一百三

十里北至樓溝堡四十里東南到五寨堡 嘉靖間

總兵周尚文建萬厯間兵備胡來貢輒斃設兵三百
防守領之 三岔堡北至深塢村賀家梁舖十里又
北至劉家溝十里偏關縣界 三岔堡東繇東塞坡
經石廟兒村十里又東至官莊村五里神池縣界
三岔堡西經大村舖五里又西至太子溝村五里又
西至韓家樓村十里寄嵐州界此繇大同西至保德
州濟河達陝西府谷之孔道也 三岔堡南至劉家
灣村五里又南至舊寨村十里又南至莊窩村五里

又南至小河頭村十里又南至石嘴頭村一十五里
又南至中所村一十一里又南至縣東關四里故明
人名堡曰三岔

大梁山十字塢東二十里寧武縣界西小徑一十四里
至薛家口又經大橋一里至周家口又二里至李家
口又三里至沙灘橋乃東關外鎮口大橋也

店坪山南三十里寧武縣界北小徑一十四里至薛家
口

老牛坡東二十五里又五里至張家坪胥蘆芽山支麓
為神池縣小辛莊界 西八里至南坪村又十里至
烟洞梁又二里至右所村又五里至東關

麻子溝溝西一十五里為岢嵐州韓光寨界

石嘴頭北一十五里

獅子口村西北三十五里又五里至韓家樓村岢嵐州

界東南小徑一十五里至郭家河村又二十五里至

中所村又五里至西關



山西通志卷十三